

So er dient vastend / Bettend / gott /  
Man sieht was hochsart arbeit hat  
Wie mā sich nutz / schmyer / nestel / brisß  
Vnd herte drück lyd / inn manche wise  
Der gydt tribt manchen über see  
Durch vngewitter / rāg / vnd schne  
In Norwegen / Pylappen landt /  
Keyn rūw noch rast / die bñler handt /  
Die spyeler haben übel zyt /  
Vil mer / der schnapp han / der do ryt  
Vff dem halßacker wogend sich /  
Des prassers will gschwigen ich  
Der allzyt voll ist / vmb syn hertz  
Was drück der lyd / vñ heimlich schmerz  
Des yfers zyt / ist nit die best  
Er vörcht eyn andern gouch im nest  
Syn eygen glyder kocht der nydt  
Nyemans durch gottes ere sich lydt  
Der in gedult ansāh syn sel  
Als Noe / Job / vnd Daniel  
Gar vil sint / den das böß gefeltt  
Gar selten der das güt erwelt  
Erwölen güts eyn wiser soll  
Das böß kunt all tag selbes wol  
Wer gybt das hymelrich vmb myst  
Der ist eyn narr / so vil syn ist  
Sin duschen der genüsset nitt  
Wer ewigs / vmb zergenglichs gytt  
Vnd das ichs kurtz mit wortten bgriff  
Gybt er eyn esel / vmb eyn psiff

